

wotrjedže za tydžeń 1 hodž. z biblije a spěwaŕskich serbski čita. Starši krajneje cyrkwe pak svojim džěćom ničo serbski wuknuć njedadža, „dokelž Radšowske džěći tež ničo serbski njewuknu“! — Přeni wučer je němski: Theodor Pauly, \* 15. jun. 1830 we Wendisch-Wällnitz, wot 1875. Druhi wučer a kantor serbski: Handrij Dučman, \* 8. aug. 1808 w Poršicach, wučer wot załoženja starolutherskeje wosady. Porno njemu běstaj z pomocny-maj wučerjomaj tutaj Němcaj: 1. Gustav Schwabe z Militscha † 1871 a 2. A. Calf, \* 1837 w Pinne 1873—75, † 1880. — Nimo toho zastupuje dla njedostatka wučerjow knjez farań wot počdra lěta město třěćeho (pomocneho) wučerja.

Přistawk. Klětnjanska (staro-)lutherska filialna wosada. Tuta je cyle serbska a liči na 300 dušow; do njeje słušeju starolutherscy z 15 wsow. W Klětnjanskej starolutherskej cyrkwi maju so jenož serbske Bože služby. Samsnu šulu wosada žanu nima; jeje wokoło 50 šulskich džěći je do 5 krajnocyrkwinskich šulow roztykanych, hdžež wosebje wot posledni 10 lět dale mjenje serbski wuknu.

#### XXVIII. (39—41.) Přeněmčene wosady Jězor-Kózlo-Dubc.

I. W Jězorskej wosadze bu serbska Boža služba 1817 na reformacijskim swjedženju (přir. Jenč, Časop. 1853—54, str. 91) zahnata, pječa „dla přemało Serbow“. Hišće džensa pak je tam samo po officialnym ličenju wot landratstwa mi přecelnje podatym 92 Serbow. Kelko wjacy bě jich potajkim 1817?! Najskerje njebě tam tehdy wjacy Němcow, hač džensa Serbow. Do teje wosady słušeju 3 wsy: Jězor (See), Wuhelc (Moholz) a Sprjojcy z Rězakom (Sproitz m. Rysack). W Jězoru su tele swójby, kotrež domach serbski řeča: Hantuš, Běrka, Wićaz, Horbašk a Škoda; w druhich swójbach bywaju jenož jednotliwi Serbja. Wjetši džěl z nich je w nowišim času do wsy pak přičahnuł pak so zaženił. Stary Běrka čitaše sebi stajnje domach swoje serbske přědowanje († 1883).

II. W Kózłowskej wosadze, do kotrejež wsy Kózlo Hornje a Delnje (Ober- und Nieder-Cosel) a Stanojšćo abo